



**Rosalía de Castro**

**Adiós ríos; adiós fontes**

2006 - Reservados todos los derechos

Permitido el uso sin fines comerciales

Rosalía de Castro

## Adiós ríos; adiós fontes

*Adiós ríos; adiós, fontes;  
adiós regatos pequenos;  
adiós, vista dos meus ollos;  
non sei cando nos veremos.*

Miña terra, miña terra,  
terra donde me eu criéi,  
hortiña que quero tanto,  
figueiriñas que prantéi,

prados, ríos, arboredas,  
pinares que move o vento,  
paxariños piadores,  
casiña do meu contento,

muíño dos castañares,  
noites craras de luar,  
campaniñas trimbadoras  
da igrexiña do lugar,

amoriñas das silveiras  
que eu lle daba ó meu amor,  
camiñinos antre o millo,  
¡adiós, para sempre adiós!

¡Adiós, gloria! ¡Adiós, contento!  
¡Deixo a casa onde nacín,  
deixo a aldea que conoso  
por un mundo que non vin!

Deixo amigos por extraños,  
deixo a veiga polo mar,

deixo, en fin, canto ben quero...  
¡Quén pudiera no o deixar...!

... ..

Mais son probe e, ¡mal pecado!,  
a miña terra n'é miña,  
que hasta lle dan de prestado  
a beira por que camiña  
o que nacéu desdichado.

Téñovos, pois, que deixar,  
hortiña que tanto améi,  
fogueiriña deo meu lar,  
arboriños que prantéi,  
fontiña do cabañar.

Adiós, adiós, que me vou,  
herbiñas do camposanto  
donde meu pai se enterróu,  
herbiñas que biquei tanto,  
terriña que vos criou.

Adiós, Virxe da Asunción,  
branca como un serafín:  
lévovos no corasón;  
pedídlle a Dios por min,  
miña Virxe da Asunción.

Xa se oien lonxe, moi lonxe,  
as campanas do pomar;  
para min, ¡ai!, coitadiño,  
nunca máis han de tocar.

Xa se oien lonxe, máis lonxe...  
Cada balada é un dolor;  
voume soio, sin arrimo...  
Miña terra, ¡adiós!, ¡adiós!

¡Adiós tamén, queridiña..!  
¡Adiós, por sempre quizáis...!  
Dígoche este adiós chorando  
desde a beiriña do mar.

Non me olvides, queridiña,  
si morro de soidás...  
Tantas légoas mar adentro...  
¡Miña casiña!, ¡meu lar!

Súmese como [voluntario](#) o [donante](#) , para promover el crecimiento y la difusión de la [Biblioteca Virtual Universal](#) [www.biblioteca.org.ar](http://www.biblioteca.org.ar)

Si se advierte algún tipo de error, o desea realizar alguna sugerencia le solicitamos visite el siguiente [enlace](#). [www.biblioteca.org.ar/comentario](http://www.biblioteca.org.ar/comentario)

